

PUKKE!
vir al u kleurbaadjies
**Johan Claassen
Broers**
(Edms.) Bpk.
Tel. 3612,
POTCHEFSTROOM.
Kerkstraat 92.
Tak: Tomstraat 100.

die WAPAD

Amptelike studentekoerant van die P.U. vir C.H.O.

In U lig sien ons die lig.

JAARGANG XXIX

VRYDAG 29 MAART 1974

Nr. 54

**CACHET
APTEEK**
Groot genoeg om u te
bedien.
Klein genoeg om u te ken.
★
**DIE
STUDENTE-APTEEK**

SPORTMOTIVERING IN DIE BRANDPUNT

Vossie Vosloo

DIE sportsimposium, wat verlede Vrydag in die Totiussaal, onder die tema Sportmotivering behandel is, kan as 'n geskiedkundige gebeurtenis vir die Puk beskou word. Dit is die eerste simposium wat deur die Sport-instituut van die Universiteit van stapel gestuur is.

Die openingsrede is deur 'n oudstudent, mnr. R. J. W. Opperman, President van die S.A. Olimpiese en Nasionale spelevereniging, gelewer.

Die sportsimposium is gelei onder voorsitterskap van prof. W. N. Coetzee en die verwelkoming is waargeneem deur prof. H. J. J. Bingle. Prof. Bingle het die verband tussen menslike spel en sport bespreek sowel as wat die sportwaarde van die toeskouer is.

Mnr. Opperman verklaar dat 'n sportman baie te danke het aan die besieling en opoffering van die ouer. Daar moet egter gewaak word teen 'n obsessie wat by die ouer kan ontstaan om die kind tot prestasie te dryf.

Dit kan daartoe lei dat sport 'n straf word vir die kind. Hy het hom uitgespreek teenoor sommige Suid-Afrikaanse afriegers wat 'n atleet as sy eien-dom beskou en hom op so 'n wyse van verdere ontwikkeling kan weerhou.

MNR. OPPERMAN

Mnr. Opperman is teleurgesteld in Suid-Afrikaanse Nie-Blanke sport. Hulle lewensstandaard steek nie af met die res van Afrika nie. Hy wou weet of dit motivering is wat kortkom. Onder die nuwe be-deling het die Nie-Blanke die geleentheid om deel te neem. Die sterkste motivering in sportprestasie is om jou land te verteenwoordig. Ons sal nie aanvaar dat S.A. geïsoleer word van sportmededinging nie. Hy beskou die nie-blanke as ons verantwoordelikheid in die verwesenliking van hulle sportideale.

Mnr. Opperman het sy rede afgesluit deur sy dank uit te spreek teenoor die regering vir die erkenning wat hulle aan sport verleen. Hy het onder meer na die Staatspresidentstoeënknings verwys.

GROEPSBESPREKINGS

'n Groepsbespreking is gehou waarin verskillende probleme onder die tema, sportmotivering, bespreek is.

'n Vleisbraai en gesellige verkeer wat deel van die pro-

gram uitgemaak het, het die mense bietjie blaaskans gegee.

Tydens die aandsitting het die groepleiers verslag gelewer van die groepsbespreking.

Ds. Johan Lamprecht, voorsitter van die W.T.A.A.U., se groep het gesels oor die nuwe betekenis van sportmotivering. Wat is die klub se rol in motivering? Hoe kan die massa gemotiveer word en wat is die rol van die kapitaal in sport? „Daar is 'n motiveringsveld wat 'n versadigingspunt kan bereik“, het hy geantwoord.

Dr. Gert Scholtz se groep vra die vraag: „Waarom neem mense deel?“

Hy sê dat topsport nader beweeg aan arbeid. „Sukses is die beste motivering vir sukses“.

Hoe moet mense gemotiveer word dat as hy presteer, hy ook beloning sal ontvang en wat is die konsekwensies wat motivering veroorsaak.

Prof. W. Putter, hoof van die Departement Liggaamlike Opvoeding het verslag gelewer oor aanleg as motiveringsfaktor. Hy het die metodes genoem waaronder aanleg ontdek kan word en onderskei tussen ouer, skool en mededinging met portuur. 70% van ons sportmanne met aanleg word nie ontdek nie. Die diagnose van die afrieter en omstandighede is remmende faktore op aanleg.

Prof. Eloff rapporteer dat die gemiddelde sportman uit die oog verloor word en dat die persoonlikheid van die afrieter 'n psigomatiese invloed op die sportman het.

In die verslag van mnr. J. A. Olivier word die buite-invloede van sport bespreek. Onder meer die pers se algemene distorsie op sportprestasies. Die atmosfeer het 'n motiverings-invloed op die deelnemer. Die massa moet betrek word om die motiveringsprobleem van die sportleier te vergemaklik.

Mnr. Harry Newton Walker voormalige Springbokrugby-speler, se groep het die nasionale agtergrond van sport bespreek.

'n Opsomming is deur prof. D. P. J. Smith, voormalige hoof van die departement Liggaam-

like Opvoeding aan die P.U. vir C.H.O. gelewer.

MOTIVERING

Prof. Smith wil hê dat die mens as geheel gesien moet word. Hy sê verder dat motivering die aanspooring tot hoër prestasie is en dat die doel van motivering deur sport moet wees. Motivering moet met drie eise rekening hou naamlik: daar moet 'n uitdaging, 'n kans vir oorwinning en erkenning wees. Motivering moet egter met die persoonlikheidsprofiel van die individu rekening hou, voordat daar met die sportman gewerk kan word.

Motivering se belangrikste basis is belangstelling en die kind moet dus tot belangstelling gelei word. Prof. Smith sluit af deur te sê dat motivering ten gunste van sukses beter is as motivering ten gunste van mislukking.

REKTOR LOOF STUDENTE


PROF. H. J. J. BINGLE het in 'n kort rede sy blydschap en dank betuig teenoor almal wat meegewerk het in die bereiking van die groot ideaal: 'n sportterrein wat etlike honderd duisende rand gekos het om te voltooi.

„Die groen velde op die oevers van die Mooirivier is daar gestel vir sportman en toeskouer, vir deelnemer en entoesias“. Die Rektor het die doemprefete wat sê Suid-Afrika is 'n land van brood en spele, in die kort hare byge-loop.

Hy het gesê dat 'n volk nie sonder sy sportmanne en vroue kan klaarkom nie, en het die studente gelooft vir hulle ywer, dissipline en volharding in die beoefening van hul onderskeie sportsoorte. Vervolgens het hy beklemtoon dat dit deel is van die mense se opvoedingsproses om 'n gesonde deelname in sport te

hê. Daarna het prof. Bingle hulde gebring aan mnr. Fanie du Toit, voormalige registrator van die Puk, wat onvermoeid gewerk het om sport-fasiliteite vir die studente daar te stel. Namens die Raad van die Puk het prof. Bingle ook sy dank betuig teenoor Old Mutual vir hul skenking. Hy het saam met mnr. Kok, wat Old Mutual by die geleentheid verteenwoordig het, die gedenkplaat onthul.

Prof. Bingle het afgesluit met 'n woord van dank aan duisende deelnemers wat 'n sukses van die dag se verrigtinge gemaak het.



„'n Gesonde gees huisves 'n gesonde liggaam“. Prof. Bingle aan die woord tydens die inwyding van die Fanie du Toit-sportterrein met dr. Koornhof op die voorgrond. (Foto: Fotokuns.)

S.A. op soek na jong sportbeoefenaars

„SUID-AFRIKA is op soek na sterk jong manne en vroue“, het dr. Piet Koornhof verlede Saterdag by die opening van die Fanie du Toit-sportterrein gesê. Dr. Koornhof het veral klem gelê op die gesondheid van 'n volk.

Dr. Koornhof het sydelings verwys na sportisolasië en die sportbande van Suid-Afrika. As voorbeeld het hy geneem

dat daar tien lande aan die wêreld-wipmatkampioenskappe in Johannesburg, deelgeneem het.

Ook het hy die feit beklemtoon dat 'n Suid-Afrikaner verkies is as sekretaris van die Wêreldwipmat Federasie. Hy het voortgegaan deur die Latynse spreuk „'n gesonde liggaam huisves 'n gesonde gees“, op die huidige sportsituasie in Suid-Afrika toe te pas.

Daarmee saam het hy skokkende syfers, vrygestel deur die Departement van Sport en Ontspanning, omtrent persone wat aan hartkwale in Suid-Afrika sterf, vrygestel. Hieruit

blyk ook duidelik, volgens hom, dat die meer sportaktiewe Suid-Afrikaner nie deel aan die hoë persentasie het nie.

Hy het die Puk gelukkigwens met die reuswerk wat die Departement Liggaamlike Opvoedkunde op die gebied van navorsing oor liggaamsoefening vir hartlyers doen.

Dr. Koornhof het afgesluit en die Puk gelukkigwens met die pragtige sportterrein. Hy het die nagedagtenis van wyle mnr. Fanie du Toit geëer met dié woorde: „Dit is goed om manne en vroue wat hard gewerk het vir 'n saak op hierdie wyse te vereer“.

Drie Pukke gekies vir Wes-Transvaal

'N SKRALE drie Pukke is gekies om Wes-Transvaal in 'n vriendskaplike rugbywedstryd teen Noord-Transvaal te verteenwoordig. Die drie spelers is Piet Roodt (senter), Piet Brand (slot) en Erié le Roux (flank).

Die keurders het besluit veras met die keuse van hulle span, as die proefwedstryd van Maandagaand 26 Maart in ag geneem word.

In die geheel gesien, is dit 'n span met weinig nuwe bloed en kan daar nie veel beter prestasies van die span verwag word nie as verlede jaar nie. Spelers soos Willie de Bruyn, Schalk van der Merwe — laasgenoemde is nie eers in die B-span nie — kan ongelukkig voel omdat hulle nie plek in die A-span gekry het nie. Veral Willie de Bruyn het 'n skitterende wedstryd in die B-span in die proewe gespeel.

★ Vervolg op bladsy 5

Die Bult
Aptek / Pharmacy
Noordbrug Aptek (Edms.) Bpk.

★ VIR AL U APTEKERBENODIGHEDE . . .
... ONS KEN U BEHOEFTE

Direkteur: Prof. M. C. B. v. R. v. Oudshoorn (L.A.V.)
Voorsitter: Dr. A. P. Goossens (L.A.V.); A. C. Dreyer
(B.Sc.-Far.) (L.A.V.) en Andries G. Coetsee (B.Sc.-Far.)
L.A.V. (Besturend).



Rondomtalie-rompe

GELUKKIG tref daar toe mos 'n koue vlag Potchefstroom. Ja, gelukkig, want dit is mos toe, wat ook daardie dames wat tot nog toe huiwerig was om met 'n lang romp op die kampus gesien te word, besluit het: nou trek ek myne ook aan. Vir die dames wat dit reeds lank dra sê ons, dankie... Ons het dit opgemerk (laat daaroor geen illusies wees nie — ons gaan eenvoudig nie toe oë oor die kampus of deur die lewe nie) en is bly dat julle voorbeeld nou groter inslag vind.

SJARMANT, GRASIEUS

Julle is dus nie verkeerd nie, dames, as julle aflei dat lang rompe vir my nie lelik is nie — intendeel julle is 100% korrek as julle aflei dat lang rompe vir my (en kollegas) sjarmant, graseus, en sommer pragtig is. Vir my en die oorgrote meerderheid mans is dit so — selfs al sal hulle dit heftig ontken, of sug as hulle aan die mini dink. Die feit is dat die lang romp die vrou, vrou maak (nadat die mini so amper iets — ek weet nie wat nie, in julle doodgemaak het).

En die man, man?

HALSOORKOP

Nou moet ek eerlik sê dat julle nou ook nie halsoorkop, toe oë en kom-wat-wil lang rompe moet begin dra nie. Dit gaan immers nie om die lang romp nie, maar dit gaan om jôu liewe ASTER. Dra dus liewers iets wat jou pas. Met rompies of rokke van die gewone lengte is daar immers niks verkeerd nie. Ek sou sê:

1. Maak tog seker dat julle skoel nie afbreuk doen aan 'n andersins volmaakte uitrusting nie.
2. Aangesien die romp die belangrikste komponent is — maak seker dat dié bloesie of truitjie dit aanvul, eerder as om daarmee te kompeteer. Effekleurige bloesies by 'n helder kleurige bont romp vang enige man se oog. Dit maak 'n mooi prentjie! Wees tog net versigtig vir lang los truie — die twee gaan nie lekker

saam nie.

3. Let op jou houding en jou stap... moenie dink die lang romp gaan jou sleepvoetstappie verberg nie — intendeel, dit laat jou lewensmoeg lyk. Die teendeel is ook waar: 'n Lang romp maak van 'n meisie 'n dame — as sy 'n mooi houding het!

4. Asseblief ASTER, moenie jou romp elke 100 treë regtrek nie. Gewoonlik gebeur dit bloot omdat jy nie gewoond is aan die romp nie. Glo my, die regtrekery is baie meer opvallend as 'n romp wat effens skeef sit.

5. Maak seker dat jou romp lank genoeg is, sodat dit nie lyk of jy hoogwater verwag nie.

6. Aandrokke pas nie op die kampus nie, wees tog maar versigtig.

7. Sorg dat jou romp nie lyk of dit so pas uit die wasgoedmandjie kom nie. Jammer om dit te sê, julle is nogal geneig daartoe — veral met die „sis-rokke“. Vir my persoonlik is 'n stewige materiaal soos wol of crimpelene meer aanvaarbaar — miskien omdat dit meer „vorm“ aan die romp

gee.

Ten slotte: Jou sosiale sukses hang nie van jou kleredrag af nie. Dit hang van jou af! Van jou vriendelikheid en jou egtheid, en by dit alles hang dit van jou sagtheid af... en sommer nog 'n klomp ander „heidte“. Die belangrikste en die meeste hang dit van jou vroulikheid af. Jou kleres is maar net 'n komponent (net soos jou grimering) waardeur jy jou ware self uitdruk. Kleedrag is nie 'n doel opsigself nie. Daarom dat daar vir my 'n mooi waarheid is in die gediggie:

Still to be neat, still to be drest,

As you were going to a feast: Still to be powdered, still perfumed,

Lady, it is to be presumed. Though art's hid causes are not found,

All is sweet, all is not sound.

Give me a look, give me a face That makes simplicity a grace; Robes loosely flowing, hair as free:

Such sweet neglect more taketh me,

Than all th' adulteries of art, That strike mine eyes, but not my heart.

Deel mooi met ander

ASTER, wanneer jy iets moois sien, lees of dink, hou jy dit vir jouself of deel jy dit met ander?

Of het ons so sinies geword dat niks ons meer kan raak nie — ek glo dit net eenvoudig nie. Daarvoor is ons nog

te veel vrou alhoewel ons van vermanliking beskuldig word.

As jy 'n mooi blom, wolkformasie of enige iets interessant sien, maak jy die persoon by jou daarop attent en wys jy hom dat jy nog die mooi dinge rondom jou kan raaksien en waardeer. Moet dit net nie vir jouself hou nie, deel dit met iemand anders en hy sal nie anders kan as om positief te reageer nie.

Is daar nie dalk iemand in jou koshuis wat eensaam en sonder vriende is nie? Wat van 'n blom of net 'n kaartjie met mooi woorde daarop vir haar. Wat sal dit nie vir haar beteken nie — meer as wat jy ooit kan dink.

Maar dit moet nie net jou sleep en beste vriendinne wees wat daarby baat nie, maar ook die ander skameties en sommer ook vreemdelinge.

Kom ons probeer om al die mooi in die lewe raak te sien (en daar is baie) en dit met ander te deel. Hulle sal nie anders kan as om ons te volg nie.

SKRIKKEL-FEES

SKRIKKELFEES... SKRIKKELFEES... skrikkel-wat? Daardie ietsie wat gaan plaasvind op 1 April, wat's dit?

Groot opgewondenheid. 'n Uitnodigingskaartjie word gemaak. Gelukkig sleep ek vas en hy sal dus móet gaan. Hoope hy hou van die oorspronklike uitnodiging. Nou sal hy weer vir 'n slag sien hoe 'n oulike meisie sleep hy.

Groter opgewondenheid. 'n Uitnodigingskaartjie word gemaak. 'n Vreemde man word geskiet (sal hy ooit ja sê!). Groot afwagting en spanning tot die groot oomblik. Sy antwoord kom en... hy sal so waar gaan!

Nou moet die spyskaart saamgestel word. Waarvan sal hy nou hou? Eerstens 'n lekker bottel wyn om die regte stemming te verkry en 'n mens iets te gee om te doen as jy daar aankom. 'n Lekker voorgerig is vis — hoop nie hy is 'n verstokte Transvaler nie! — Pietersielie kan bygesit word of hoe? Die hoofgereg — heerlike hoenderpastei! — word verskaf. Ek sal sommer 'n slaaitjie of wat bymaak. En natuurlik lekker nagereg. Wat van roomys? Klink na 'n feesmaal!

Eindelik die groot dag: Maandag 1 April! Die senuwees is omtrent aan flarde. Nadat met almal „April fool“ gespeel is, begin die groot mooimaak. Hare word gewas, naels gepolitoer. Nou wat is nou informeel en tog mooi genoeg om die man se hart totaal te vermurwe. Daardie nuwe lang romp van my is net die ding. As hy darem nie soos 'n sak patats voor my neersak nie...

Met pèrevel onder die blad, kosmandjie aan die hand en die man aan die ander hand, sak ons so teen 6.15 se kant na die Fanie du Toit-sportterrein. Langs die pad word uitgevind wat die ander party swot en hoeveel kinders hulle is en word besluit dat dit 'n pragtige aand is. Teen 6.30 kom die Fanie du Toit in sig en vlot die geselskap net mooi. So begin die fees van die jaar gehou deur feestelike mense.

'n Skouspel van 600 mense op pèrevelle, elk met 'n eie ete en liggie, is iets onvergeetliks. Hier en daar is selfs 'n lantern. Die kerse lyk pragtig — al wil-wil dit net doodwaai! Alle vorms en kleure batterylampies kan ook gesien word — 'n see van liggies — nes sterretjies! In die agtergrond word musiekies gemaak deur ons eie-eie mense en alles is net te romanties.

Die man ontdooi spoedig nog verder (ek of die wyn of die atmosfeer?!!) en alles gaan klopdiselboom. Die wyn verdwyn en die kosmandjie word teen dieselfde spoed lêr as wat die vriendskap groei. Wonderlike man wat alles eet en alles waardeer!

Die hoofgereg kry ons so warm-warm en die Pukke vier groot feeste. Eindelik is al die kossies op, al die magies vol en al die ogies wil toe. Maar daarvoor is daar nog lank nie tyd nie. Dis nou eers tyd vir regskud op die pèrevel en na die fliek kyk. Almal skop nes op 'n plek vanwaar die krieketskerm — en dus die fliek — mooi in die gesigsveld is en met kinderlike tevredenheid word ontspan soos net studente dit kan doen.

Die einde van die fliek beteken ook die einde van die aand en byna die einde van die kwartaal! Ons pak alles op — die pèrevel onder die blad,



Foto: Fotokuns.

die kosmandjie in die hand op 1 April en die Dameskomitee dra sorg dat dit groot sal wees. Sorg dat jy dit nie misloop nie!

Hierdie ietsie gaan plaasvind Skrikkel... wat? Skrikkelfees!

LAG

EK GLO daar is geen mooier gawe aan die mens gegee as die hartlike lag nie!

Die lag en die opgewektheid is vir die mens se gees wat sonskyn vir blomme is: dit straal warmte, lewe en behaaglikheid rondom uit. Dit vind altyd suiver en onmiddellike aanklank by die medemens se diepste self.

Ek glo dit is beslis nie toevallig nie dat die wyse Skepper onder alles wat Hy geskep het slegs die mens uitgevoer en aan hom die voorreg van die lag gegee het. Hy het geweet dié gawe was nodig omdat die mens ook die enigste skepsel is wat elke dag oor die lang weg van teleurstellings heen moet beweeg — en vir dié stamperige pad is die lag die mees effektiewe veerstelsel wat hom met die minste ongemak daaroorheen kan bring.

Ek hou van die hartlike skaterlag, van lewensvreugde wat spontaan en ongedemp soos 'n donderbui in die somer skielik emmersvol oor alles rondom neerstort.

Ek hou van die skaterlag — maar ek hou nog meer van die glimlag: die ondeunde plooi langs die lippe, die vonkel in die oë, die sku trekkie om die mond.

Die stil glimlag is die taal waarin vriende met mekaar gesels, intieme vriende en bemindes wat op 'n magiese wyse ver agter die bewuste met mekaar verbind is deur aanvoeling en begrip wat woorde onnodig maak. Dit is die sagte lig wat deur oë straal en sê „Welkom — jy is tuis!“

Uit: Ek glo — Gerhard Beukes.



GERUGTE...?

LYK mos of die DAMESKOMITEE deesdae bedrywig raak? Ons hoor allerhande gerugte van 'n „Klee-volgens-jou-postuur“-parade. Julle hoor nie verkeerd nie, Oosterhof bied op 22 April die aksie in die Totius-saal aan, spesiaal vir al die Puk-Asters!

By dit alles gaan van ons eie ASTERS die mannekyne wees, en as nagereg die „top“ modelle van die ANN BOTES-Mannekyn en Afrondingskool. Ons waarsku julle solank, om die datum oop te hou, want dit gaan 'n fees wees wat die Puk lank nie beleef het nie.

Advies hoe om aan te trek en al jou minder goeie punte te verdoesel gaan mev. Botes self bespreek, en natuurlik vir jou wys net hoe om altyd op jou beste te vertoon.

Nou sê ons verder niks... Hou die DAMESKOMITEE se plakkate dop en wees verseker dat jy daar is.

DIE SKOENSENTRUM

KERKSTRAAT 151

TEL. 3508.

Vir die beste modes in
studente skoen-smake

DIE SKOENSENTRUM

UITSIG ARKADE,

DIE BULT.

—ST

Weg met onbetrokkenheid

— Elke Puk het 'n plig

JAARLIKS stuur elke Universiteit en onderwyskollege in die land 'n reuse „gedoente” van stapel. Of hulle dit nou jool of karnaval of wat ook al noem, die doel bly dieselfde: Om aan studente geleentheid te bied om hulself spontaan, maar sinvol uit te leef op 'n terrein weg van die akademiese en in die proses geld in te samel vir die minderbevoorregte element in ons samelewing.

Die organiseerders van hierdie veldtogte ondervind elke jaar tientalle probleme in die van stapelsturing daarvan. Sommige van die probleme is plaaslik, maar ander word op elke kampus in die land ondervind. Een van die mees algemene klagtes wat gehoor word gaan oor die onbetrokkenheid van die studente.

PROEFNEMINGS

Gedurende die afgelope tyd is daar heelwat proefnemings gedoen met die organisasie van karnaval op die grondslag van interkoshuismededinging. Op die PUK is baanbrekerswerk in hierdie rigting gedoen met die organisasie van karnaval en die sukses wat verlede jaar behaal is, beklemtoon duidelik die meriete van die proefneming.

Vanjaar gaan gepoog word om nie alleen op verlede jaar se sukses voort te bou nie, maar om ook daarop te verbeter. Om die moontlikhede van hierdie stelsel ten volle te ontplooi het die Sentrale Karnavalkomitee direkte kontak met elke koshuis nodig. Hierdie kontak word bewerkstellig deur die kompetisievertegenwoordiger in die koshuis. Hulle is aangestel op grond van die vertroue wat in hulle inisiatief en werkywer gestel word. Ten spyte van hierdie eienskappe kan hulle egter nie hul taak met sukses uitvoer sonder die samewerking en ondersteuning van jou wat hierdie artikel lees. ELKE PUK moet eenvoudig hom of haarself gee.

Drie ernstige struikelblokke lê egter in die weg van die totale betrokkenheid.

GROOTMENS?

Die heel eerste en verreweg die vernaamste hindernis is

lewe is net wat jyself daarvan maak. Die geleentheid is vir jou geskep maar jy moet dit self benut.

EERSTEJAARS

In die aansluiting hierby

koshuistradisie omgee as hulle wat reeds ou ingesetenes is nie.

SELFSUG

In die laaste plek is daar die selfsug wat dit van som-



Voorbereidings vir Karnaval '74 se interkoshuiskompetisies is reeds in volle swang. Op die foto bespreek twee van die koshuisvertegenwoordigers, Tjaart Venter (Liberalia) en Jeanette Singeling (Vergeet-my-nie) 'n paar praktiese probleme met Febé Backer van die Sentrale Karnavalkomitee. (Foto: Sam Basch.)

die moderne student se hipersensitiwiteit wat betref sy volwassenheid. Om jou studente-lewe op hierdie manier te geniet dui vir hulle op die kinderagtige.

Dit is tyd dat ons as studente moet besef dat ons nie grootmense is nie — ons is JONGmense. Neem gerus aan hierdie Karnaval met volle oorgawe deel en jy word verseker dat jy dit sal geniet — MITS JY JOUSELF ONTVANKLIK MAAK. 'n Mens se

kom ons by die tweede struikelblok, te wete, die houding dat hierdie bedrywighede vir eerstejaars gereserveer word. Deur Karnaval op interkoshuisbasis te organiseer word elke koshuis se naam baie pertinent op die spel geplaas. Wat 'n kwade dag moet dit vir enige koshuis wees wanneer die eer daarvan slegs in die hande van die eerstejaars geplaas word. Hulle is tog nuwelinge, wat uit die aard van die saak nog nie soveel vir die

mige studente die meester maak. Vir hulle gaan dit net daarom om vir hulself die tydjie so aangenaam moontlik te maak. As hy of sy maar soveel drank kan opslurp, soveel as moontlik sleeptyd kan inkry of selfs kan wegsloop huis toe kan dit hom of haar nie skeel of karnaval sy doel dien of nie. Gewoonlik is dit ook hierdie mense wat na karnaval die meeste kla dat daar niks aangegaan het nie.

★ Vervolg op bladsy 6

Verpleegsters gesels

DIE Pukdames is Maandagaand die 18e in Fort A die geleentheid gebied om hulle menings te lug i.v.m. aktuele sake van vandag wat elke dag elke vrou raak, nl. proefhuwelike, aborsies en gesinsbeplanning.

'n Inleidende praatjie is deur mev. F. de Villiers, lektrese in verpleegkunde gelewer. Sy het veral die volgende terme duidelik uiteengesit en dit toe aan ons oorgelaat om vir onself te besluit wat reg of verkeerd is.

Onderwerpe soos aborsie, terapeutiese aborsie (wetlike), proefhuwelike wat spruit uit die hedendaagse permissiwiteit, gesinsbeplanning en voorbehoedmiddels. Illustreerende kaarte is versprei.

Geleentheid is toe gegee vir debattering en met die redensies wat vorendag gekom het kan mens sien dat die jong

dames vanuit 'n Christelike standpunt redeneer.

'n Voorstander vir proefhuwelike het egter hewige reaksies ontlok toe sy aan die woord kom en dit goedpraat. Dit bewys dat alhoewel die studentedames aan hierdie Universiteit daarteen gekant is, daar tog wel die enkeling is wat al in terme van proefhuwelike dink en ons is bevrees dat die getalle in die toekoms sal toeneem.

Ons sou net graag ook die manne se menings wou hoor!

Vir die baie interessante en iersame praatjie en die leiding wat sy ons gegee het, wil ons vir mev. De Villiers baie dankie sê en ons sien uit na meer sulke aande.

Anne du Plessis.

In Memoriam



ELSA VAN DEVENTER

DIE inwoners van Oosterhof is diep geskok deur die dood van Elizabeth Hendrina (Elsa) van Deventer (20), 'n student in die Rekenaarswetenskap.

Elsa is op 28 Februarie in die Potchefstroomse hospitaal opgeneem, en op 4 Maart na die Eugene Marais hospitaal in Pretoria oorgeplaas. Na 'n operasie op 12 Maart is sy in die intensiewe sorgeenheid oorgeplaas.

Haar toestand het steeds versleg, en sy is Dinsdagoggend 19 Maart oorlede.

Elsa was die jongste dogter van mnr. en mev. J. W. L. van Deventer van Hercules, Pretoria, voorheen van Welkom.

Elsa het aan die Hoërskool Goudveld gematrikuleer. Sy was 'n lid van die Filatelie vereniging, en het vir Oosterhof hokkie gespeel.

Sy is Woensdagoggend 20 Maart uit die N.G. Kerk Dampoort begrawe. Ses van haar vriendinne uit Oosterhof het as draers opgetree.

FLIEKS

WAT sê die sakboekie vir dié week se A.O.B. fliëkreeks?

Vrydagaand in die Totiusaal kan Pukke wat nog nie geleentheid gehad het om Barbara Streisand en Ryan O'Neal as 'n skitterende kombinasie te sien nie, gaan kyk na „What's up, Doc?”

Hierdie komedie van Peter Bogdanovich het sover oral baie goeie kritiek ontlok en 'n A-sertifikaat by die algemene uitstalling ontvang.

Dit is die verhaal van 'n baie verstrooide jong professor en 'n eksentrieke jong dame wie se tasse in San Francisco deurmekaar raak, en word beskryf as „an outrageous comedy, totally and intentionally without social significance”.

Ander bekende sterre wat in dié prent te siene is, is Kenneth Mars, Sorrell Boch en Madeline Kahn. Dit is laasgenoemde se debuut waarvoor sy gunstige kritiek ontvang.

„What's up, Doc?” word versprei deur Kinekor.

SWEMBADDENS VIR KLAWERHOF

KLAWERHOF het Vrydagaand 22 Maart die fees van hul geskiedenis gehou toe die twee antieke swembaddens in die vierkant ingewy is. Die eregaste op hierdie gedenkwaardige geleentheid was Over-de-Voor.

Die twee swembaddens — een vir kinders en een vir... dames! — is in die jare toe voor die Boere Oorlog deur Ernest Oppenheimer en Barney Barnato aan die inwoners van Klawerhof geskenk. In die jare veertig het die twee badens spoorloos verdwyn, maar is hierdie jaar deur die oorspronklike dore op die solder ontdek.

'n Feestelike stemming is

geskep deur die dames se fleurige hoewel formele drag, afgerond deur 'n groot verskeidenheid sportskoene in alle moontlike stadia van verweer. Die eregaste was natuurlik die swemspanne van Klawerhof en Over-de-Voor.

Op een na was die volle swemspan van 1910 teenwoordig en die dames het selfs ingewillig om elk hul besondere talente te demonstreer —

die sprinkanslag, vryswem in sand en vet, gembokke bekruip en nog baie meer. Hierdie dames verteenwoordig ook die emansipasie van die vrou — soos duidelik sigbaar was aan die swemdrag en die afsydige houding, byna militêr, teenoor die manlike geslag.

Die kapteine van hierdie glorieryke span was mej. Krummel van Vuuren. Ten spyte van 'n ernstige jigaanval het

sy haar span met trots en gesag voorgestel, en ook die trofee wat Klawerhof in 1910 verower het. Dit is nou nog in Klawerhof se besit omdat niemand dit nog sedertdien wou hê nie.

Die span van Over-de-Voor, kleurvol aangetrek, was aan vanklik baie verslae oor die afsydige houding van die dames, maar het gou herstel en 'n baie interessante vertoning gelewer. In die span was 'n lid wat met die water sou stoei, en ook een wat die ewebeeld van Glenda Kemp was. Die hoofspeler op die fees was mnr. Leo van Schaik. Hy het die swemspan van 1910 met heimwee laat terugdink aan die dae van Winston Churchill, en 'n hoogs vleien-de toespraak oor die kwaliteit van die vier Klawerblare gehou.

Die hoogtepunt van die fees was die kaas-en-water waarmee die amptelike inwyding voltooi is. Daar was selfs 'n keuse tussen rooi en wit water! Van nou af is Klawerhof natuurlik 'n bedreiging vir al wat 'n swemspan op die plaas is — wees gewaarsku!



In hul „formele drag” luister die eregaste aandagtig na die voorstelling van die swemspanne.

U kan gerus u bande versool by...

**NATYRE
BANDAG**
(Edms.) Bpk.



'N VOLLEDIGE BANDEDIENS ONDER EEN DAK
Groot Voorraad

- ★ NUWE en VERSOOLDE bande
Versoling nou ook verkrygbaar in die
GOODYEAR G 800 loopvlak
- ★ Nuutste toestel vir WIELSPORING en
-BALANSERING.

LOMBARDSTRAAT 37 — POTCHEFSTROOM
Skakel 3297 vir betroubare diens en laagste pryse.

—ST



die WAPAD

VAKANSIE

Die eerste rusperiode van 1974 lê net om die draai. Aprilvakansie is 'n vakansie waartydens baie kongresse, kursusse en toere plaasvind. Pukke onthou waar u ook al optree of kom in 'n groep of as enkeling, u bly 'n Puk en handel volgens die Puk se beginsels.

Kuesta '74 vind in Bloemfontein plaas en 'n hele aantal Pukke sal dit bywoon. Kuestagangers geniet die fees, maar probeer om die trofee vir die beste gees na ons kampus toe saam te bring.

ALMA MATER

Die Alma Mater van die Puk is, en so behoort dit te wees, elke Puk se trots. Dit is ons eie, ons erfdeel, daar is geen ander universiteit wat ons Alma Mater het as hul universiteitslied nie. Een en elke Puk moet dan ook die nodige eerbied toon wanneer ons Alma Mater gesing word. Verlede Saterdag met die ingebruikneming van die Fanie du Toit-sportterrein het sekere studente rondgelopen en gepraat terwyl ons Alma Mater gespeel het. Pukke toon die nodige eerbied.

SÊR-KOMPETISIE

Hartlik geluk aan ABKK wat weer eens 'n geslaagde sêr-kompetisie aangebied het. Die gehalte van die sang was hoog en die wenners verdien vermelding. Baie geluk aan Oosterhof, Klooster, Overhof (Klawerhof en Over de Voor). Al drie hierdie groepe het werklik verdien om te wen.

IS DIT NODIG OM DAMES TE HOK?

EK GLO dat ek vandag 'n saak gaan opper wat groot byval gaan vind by bykans alle mansstudente en ongeveer driekwart van die damestudente. Daar is natuurlik daardie ander kwart waaroor daar veel te sê is.

Die saak wat ek wil opper is die sg. hokkery van eerstejaar damestudente. Volgens wat ek kan uitvind en sover dit my kennis strek is die ontgroening op die Puk verby. Die dames moet my sê indien ek verkeerd is, want blykbaar glo die dameskoshuise nie daarin nie. Ek glo die eerstejaar dames kan na die formele ontgroening — wat lankal verby is — beskou word dat hulle hulself kan gedra. Maar ongelukkig is daar sekere „elemente" wat nie daarin glo nie. En daarom die kinderagtige optrede van ons senior dames om die sg. „gehokkery" in te stel. Ek glo nie daar is enige doel daarin nie, behalwe ongewildheid en aftakeling van

goeie verhoudinge.

Daar is die afgelope weke en word vir die weke wat kom, baie interessante deur die A.O.B. gereël, en word daar 'n beroep op die studente gedoen om hierdie aksies by te woon. Daar word moeite gedoen om goeie rolprente te vertoon, maar ongelukkig moet ons bysê dat dit slegs vir seniërs gereël word, want die eerstejaars word gehok. Dit wil sê, inherent is dit eintlik 'n dwarsboming van die A.O.B. wat soveel moeite doen. Daar is baie senior dames wat eensgesind is met hierdie stelling, maar ongelukkig onderdruk word deur die sg. „superseniërs", wat nie alleen saans in die koshuise wil bly

nie, maar hulself wil vermaak met die eerstejaars se teenwoordigheid.

Die veelbesproke verskonings van dat die eerstejaars „haans" is, en dat hulle swak doen in die koshuisbrosesamens, en nog vele meer word aangevoer as redes vir hok, en dan moet die gehoktes allerhande twak sit en swot terwyl hulle vir 'n uur of wat kon ontspan het en daarna akademies kon verkeer het. Maar aan so iets word nie gedink deur die oogklapbedekte senior dames nie. Ek dink hierdie saak moet ernstig beskou word en ek doen 'n beroep op die senior dames — gee die eerstejaars ook 'n kans. Senior.

Hit die Woord

Hand. 1 : 8: „En julle sal krag ontvang wanneer die Heilige Gees oor julle kom en julle sal My getuies wees... tot aan die eindes van die aarde."

Hierdie woorde is die laaste woorde van Jesus Christus aan sy kerk voordat hy na die hemel opvaar. Hiermee word daar gesê dat elke gelowige kind van God die besondere roeping het om 'n getuie te wees vir sy Koning, Jesus Christus.

Saam met die roeping kom ook die troos dat die gelowige nie op sy eie krag hoef staat te maak om getuie vir Christus te wees nie. Die krag om te getuig ontvang die kind van God van die Heilige Gees. Dit is die Heilige Gees wat in die mens se hart werk en hom aandryf sodat Jesus Christus in sy lewe hoofsaak word.

Die kind van God mag hom dus nooit skaam vir sy geloof of vir sy God nie. Hy mag nie bang wees om voor almal sy geloof uit te leef of uit te dra nie. Hiëroor sê Christus self: „Elkeen wat My sal bely voor die mense, hom sal Ek ook bely voor my Vader wat in die hemele is. Maar elkeen wat My verloën voor die mense, hom sal Ek ook verloën voor my Vader wat in die hemele is".

SÊR KAMPIOENE



Oosterhof se sêrgroep. Wenner van die damesafdeling. (Foto: Fotokuns.)



Die sêrgroep van Klooster wat die mansafdeling gewen het. (Foto: Fotokuns.)

Ai, die swartkraaie

GEAGTE REDAKTEUR, — Geraas! geraas! geraas! ... dit is al wat ons elke dag moet aanhoor. Indien dit nie bouers is nie, is dit die dames se aanhoudende gesels (geskree?) met mekaar.

Terloops Martiens, het jy al saam met 'n groep dames klasgedraf? Soos hulle darem kan skreeu op mekaar ten einde elk haar sê te sê! Dit herinner mens aan 'n Franse uitdrukking: „Ils bavardent comme des pies" (Hulle raas soos swartkraaie). En Meisie, as jy van my verskil, staan stil en luister wie se stemme jy die meeste kan hoor...

Eintlik, geagte Redakteur, wil ek deur hierdie medium oor 'n veel erger en meer irriterende geraas kla. In my vyf jaar op die plaas het een ding nie verander nie — die ewigdurende vliegtuie! Hoe is dit moontlik dat ons owerheer nog nie vir ons 'n oplossing gekry het nie? Ons is tog 'n opvoedkundige inrigting, met die Onderwyskolle langs ons. Waarom moet hierdie muskietvliegtuigies (nie so klein nie, maar so lastig) aan mekaar juis reg oor die kampus dreun?

As my geografiese kennis reg is, is die gebied wes van Potchefstroom of die lughawe tog merendeels veld en/of onbewoonde gebiede, en nie soseer inrigtings waar elke woord belangrik is nie. Verder, ek kén al die tekens... Hierdie vliegtuie nou bedags, oefen net sodat hulle weer in eksamentye saans kan rondreun...

Doen tog asseblief iets, geagte S.R.! (As my kettie nie weg was nie, sou ek dit doen.) Oupa Jasper.

GELUK

GEAGTE Redakteur, ek wil graag mnr. Kobus van der Walt gelukwens met sy artikel in verlede week se „Wapad". Dit wat hy kwytgeraak het is dinge wat lankal gesê moes wees, maar altyd agterweë gebly het. Ek ondersteun sy standpunt ten volle.

Studente wat nie die artikel gelees het nie, kan gerus moeite doen om dit in die hande te kry en te lees. Dit is miskien juis hulle wat dit moes lees. Pukkies.

GOEIE IDEE!

GEAGTE REDAKTEUR, — „Studentemening" van 22.3.74 is beslis een van die beste en mees aktuele aanbiedinge wat die afgelope aantal jare onder hierdie hoof in die „Wapad" verskyn het. Dit is verblydend om te sien dat daar nog van ons studenteiers is wat bereid is om reguit te praat wanneer dit nodig is.

Ek hou veral van die skrywer se idee om Studenteraadslede by die teekan tot verantwoording te roep. Hulle is egter hoegenaamd te besig om 'n halfuurtjie by die teekan deur te bring. Daar is te veel belangrike sake om af te handel. Nogtans hoop ek die idee sal nie by 'n klomp dooie letters in die „Wapad" bly nie. J. Kruger.

DAMES NIE SÓ ERG

GEAGTE REDAKTEUR, — Na aanleiding van „Polemiet" wat te velde getrek het teen die Puk-asters — ek het ook iets op die hart. Blykbaar ly sommige van die manne aan 'n vervolgingswaansin. Dit is bloot uit belangstelling dat die meisie vra wat jy sal wees as jy tot die praktyk toetree, dis nie te sê sy vra jou om te trou nie!

As die dames julle groet of 'n geselsie aanknoop is dit nie te sê sy soek 'n sleep nie. Waarom dan feitlik weghardloop slegs om 'n groet vry te spring. Moenie weer so verbaas lyk wanneer jy 'n groet vanuit 'n onbekende oord ontvang nie. Dis Puk-wees.

Dit kom my ook voort as die Puk-manne nie meer genoeg stamina het nie — word sommer afgeskrik ná die eerste afspraak met die aster. Onthou, jy kan nie al die asters oor dieselfde kam skeer nie. Hoekom laat jy jou afskrik deur een of twee wat nie bereid is om saam met jou fliek toe te stap nie. Ek praat namens 'n hele paar van ons asters — ons verkies manne sonder motors, dis baie veiliger!

Manne, waarom kies julle net die dames waarmee julle kan spog? Is julle vriende se goedkeuring só belangrik? Kyk een maal dieper en ontdek 'n oulike aster. Julle sal die uitstappie geniet... te voet!

„Voorwaarts Mars!"

SR BESLUIT: 'N GRONDWET VIR ELKE LIGGAAM

15 MEI IS D-DAG

OP DIE laaste S.R.-vergadering is besluit dat alle liggame wat by die Studenteraad gepatroneer is, voor 15 Mei 'n Grondwet en Reglement moet opstel. Verenigings, klubs, selle en komitees wat nie hul huis in orde bring vóór hierdie datum nie, sal, volgens S.R.-besluit, vervoer, uitbetalings van gelde ens. geweier word, totdat 'n grondwet en huishoudelike reglement ontvang is. Sulke vereniging stel hulle ook bloot aan dispatronering.

DEURMEKAAR

Hierdie drastiese stap volg uit die feit dat ongeveer net 15 uit die sowat 120 studenteliggamme op die Pukkampus se Grondwette opgespoor kon word. Volgens 'n uitgebreide verslag wat mnr. Paul Krüger voor die Studenteraad geleë het, skep dit probleme ten opsigte van kontinuiteit en verkiesing van besture. Daar is verder onsekerheid oor die presiese taak en terrein van elke liggaam — 'n ernstige probleem waar daar so baie verenigings is wat op mekaar se tone kan begin trap.

Vorige jare se Studenterade wou elke keer die hele saak oor die Grondwette en Reglemente finaliseer, maar daar is nog weinig aan die saak gedoen, sodat daar feitlik nêrens op skrif gestel is hoe al die baie verenigings op die Puk inmekaar steek nie.

48-UUR KENNIS

Die normale vereiste by 'n

opstel of verandering van 'n grondwet is dat daar aan lede 48 uur kennis gegee moet word alvorens die nuwe grondwet behandel word. Waar al 120 liggame nou grondwette moet opstel, kan hierdie reëling onnodige vertraging in die hand werk. Daarom het die Studenteraad besluit dat alle Grondwette en Reglemente vanaf 31 Maart opgeskort word. Geen vereniging het dus vanaf hierdie datum tot 15 Mei 'n Grondwet nie en funksioneer voort volgens gewoonte of gebruik. By die opstel van nuwe Grondwette en Reglemente kan dié sonder die gebruiklike 48-uur kennis verandering word op 'n ledevergadering. Daar moet egter soos gewoonlik deeglik kennis gegee word van so 'n vergadering waarop die liggaam sy grondwet wil goedkeur.

STEL SELF OP

In die verslag sê mnr.

Krüger: „Uiteraard weet elke liggaam die beste watter vereistes hy wil stel in sy Grondwet en Reglemente. Daarom sal daar, soos in die verlede, aan elke hoof- en onderliggaam gevra word om self hulle grondwette en reglemente op te stel en aan ons voor te lê”.

In oorleg met dosente van die Regsfakulteit word daar gewerk aan 'n standaard-rylyn by die opstel van die grondwette en reglemente en aan elke vereniging en komitee beskikbaar gestel.

Elke vereniging word versoek om spesifiek iemand aan te wys wat verantwoordelik sal wees vir die Grondwette en Reglemente van sy vereniging. Indien daar onduidelikhede is, kan hulle met die Studenteraad se Konstitusiekomitee skakel, naamlik mnr. Paul Krüger en mnr. Carel van Heerden.

AMOREUS AKTUEEL

HIER KOM DIT WEER: almal moet luister want almal word beloer. Veral die mans moet hierdie week ligloop, want die asters is op loer na 'n maatjie vir Maandagaand EEN APRIL! Ons hoop julle weet hoe belangrik die dames-aksie is!

Ja-nee, moenie dink dat Soetdoringse „massa-eerstejaars” die sleepaksies agterweë laat nie. Augusta van Huysteen en Thea Heynecke; dalk moet julle die oudames bietjie inlig wat die resepte is, of het Theo en Ronnie sommer vanself opgedaag? Moet dan ook nie Elsa Pienaar, Elmarie Beavan en Elrina Malan vergeet nie, want Faan, Danie en Attie byt nog erg vas.

Lilla Steenkamp se lig is 'n Lichthelm (aan haar sy) en skielik kom die vraag by my op: Rita Terblanche en Herman Steyn — wat beteken dit as 'n mens so baie by die skoonouers oor en weer kuier?

Gehoor van Christa Goosen. Sy wil na harde studie en vele oorweging 'n non word, sowaar net om by André se woonplek, naamlik Klooster, te pas.

Vanaf Klawerhof word berig dat plig voor plesier kom, maar almal voel dit is hulle plig om te sleep. Ria Zooyman moet versigtig wees dat Corrie Kraamwinkel haar nie vir Reklamedoeleindes gaan gebruik nie, terwyl Marietjie de Bruin en Philip Welman deesdae belangrike H.K.-sake gedurende sleeptyd bespreek.

Verder het Lientjie Kempff en Nico le Roux, asook Krummel van Vuuren en Jan Malan nog 'n rustige slepery aan die gang.

Ons sien ook vreemde invloede op ons kampus: Elmarie Robertse, wat se „geel-windla-waai” was die naweek hier of is dit dalk 'n inter-universitêre skakeling met Tukkie?

Kathy Verster, die Puk-administrasie bedank jou en Sakkie Pieterse vir die pragtige voetpad tussen Over de Voor en Heide.

Glo my Heide se H.K. hou die diamantring. Grizel en Willie is die goeie voorbeeld. Dis dan ook nie snaaks dat Vida vir Stadler van Zyl so vinnig aangekeer het nie.

Riana van Wyk glo aan „ab-

Marina Beukes en André kan net nie besluit of 'n mens te voet of per voertuig die lekkerste sleep nie. Anette Greyvenstein gaan aan die einde van die jaar 'n beker kry vir die beste gebruik van sitkamergeriewe vir sleep — geluk

hoor! Maatjies voor ons miskien ophou... laat ons maar weer van voor af begin. Onthou om te lewe, en dat elke dag vol kleur en blom is! Geniet elke oomblik en bly jonk. Julle maatjie.



„My nooiëntjie lief in die moerbeiboom.”

„Want ware liefde het ek reeds gevind.”

Want jy is my mooi rooikop nooi, so kosbaar soos die mooiste pèrel”

— flits deur my gedagtes en ek neurie, die wysies deurmeekaar.

In my neusvleuels is die reuk van Jasmyn en Frangipanis, en my gemoed is 'n kontras met die herfs, vol van die bruisende lente. Die rede vir bogenoemde liriese verwysings is dat sy so pas verby my gestap het, hier waar ek en my klasmaters aan 'n koel drank sit en suig.

Sy is liewe Pukke, my meisie op die Puk, wat woon in 'n koshuis op die plaas. Terwyl die herfsommetjie se hitte uitstraal kyk ek haar agterna en wonder met 'n tikkie weemoed, of sy my regtig raakgesien het, en of dit maar net die simpotome van 'n vriendelike persoonlikheid is.

Pukke-mans, daar loop letterlik honderde sulke Asters

op die kampus rond, wat mooi, as 'n afgewaterde en verouderde term laat lyk.

Maar Puk-man, sit hier in jou alwetendheid soos 'n wyse vader en bespiegel oor die reën, wat die rugby in die wiele ry, uitlaatstelsels vir motors, die brandstofkrisis en toetse. Want Puk-man, jy sleep mos nê, nie ter wille van sleep nie, tog te bang sy trek jou kansel toe. Puk-man jy met jou skul-bedekte oë, met jou uitsoekerige onvergenoegdheid, jy moet sleep omdat sleep sleep is, kuier, omdat kuier kuier is, en groet omdat groet groet is!

Die jare kom en die jare gaan en jy sit nog steeds vasgekleuier in jou eie wêreld van „oujongkerel-wees” alleen.

As jy haar nie raaksien nie, is jy blind en as jy haar wel raakgesien het sleep gou, voordat 'n ander haar (en daar is vir almal) gaan pluk uit die tuin van rose.

Aan my meisie op die Puk: Groete, sien jou by die Kateria...

Astrologie

OP 18 Maart 1974 het dr. Ettienne de Villiers 'n selvergadering in Klawerhof toegesprek oor sterrewiggelary.

Die oorsprong van sterrewiggelary kan baie eeue in die verlede teruggevoer word. In sy inleiding het dr. De Villiers daarop gewys dat die sterre in 'n reguit lyn lê wat in twaalf gelyke indelings om die son beweeg. Vroeër het die mense hierdie groepe sterre name gegee wat vandag nog baie bekend is: Ram, Leeu, Kreef, Tweeling, Weegskaal, ens.

Omdat die mense nog nie werklik kennis van die sterrestelsels besit het nie, het hulle ook nog nie geweet dat die sterre beweeg nie. As gevolg van hierdie onkunde is aanvaar dat die sterre gode is. Die sterre voorspel...

Hierdie voorspellings hang baie nou saam met die posisie wat die sterre inneem. Die maan het bv. 'n baie groot invloed op die reënval. Reënval word dus so volgens die stand van die maan voorspel.

Ook die posisie van die sterre het 'n direkte invloed op die seisoene wat op hulle beurt weer 'n fisiese invloed op die mens het. Sodoende kan langtermynvoorspellings gemaak word oor die psigiese lewe van persone deurdat daar bloot regaan word op die posisie van die sterre. Gedurende die tydperk 21 Maart tot 21 April kan dit so gebeur dat 'n persoon dikwels mistroostig is as gevolg van reënigerige weer — voorspellings onder die Ram word dan hierop gegrond.

Sterrewiggelary moet deur elke Christen veroordeel word op grond daarvan dat dit in stryd met die Woord van God is. Dr. De Villiers het daarop

gewys dat dit van Oosterse oorsprong is, waar dit gesien is as 'n bo-natuurlike godevoorspelling. God se heerskappy oor hemel en aarde word dus in die geheel verwerp.

Dr. De Villiers het verder daarop gewys dat beoefenaars van astrologie in noue kontak is met die Satan-kultus en duiwelsaanbidding. Hierdie aspek alleen is al genoeg om astrologie heeltemal te verwerp.

„Gekierang”

verfilm vir TV

DIE derdejaars in Spraak en Vertolkingskunde se aanbieding, Jy't my Gekierang, onder regie van mnr. en mev. Schutte, is van so 'n gehalte dat dit vir beeldradio-opnames gekies is.

Die vertoning is deur Louise Smit, 'n voornemende televisieregisseeuse, bygewoon. Sy was in so 'n mate beïndruk dat sy die stuk vir haar eksamineringsprogram gekies het.

Die oorspronklike program, op die eerste en tweede Maart aangebied, was 'n huldigingsprogram ter ere van die digteres, Ingrid Jonker.

'n Groep van negentien studente het die program aangebied. Weens tegniese probleme is slegs vyf spelers vir die beeldradio-opnames gekies.

Hierdie spelers sal van nuuts af die rolle moet instudeer, daar die beeldradioprogram anders sal uitsien.

Montium durf die steiltes aan

KLUB MONTIUM gaan die komende Aprilvakansie die ysige koue en die steiltes van die Drakensberge trotseer.

Die groep vertrek die Woensdag as die Puk sluit en die vervoermiddel is Rysmierbult se skoolbus. Die plan is om vanaf Mount aux Sources tot by Cathedral Peak te klim, ongeveer 65 myl. Diegene wat die Drakensberge effens ken, sal weet dat dit klim en nogmaals klim is.

Almal is egter baie entoesiasies, en ons sê vasby vir al die nuwe ouers wat saamgaan. Dit sal egter die moeite werd wees.

Die petrokwessie skep baie probleme vir 'n klub soos Montium wat ver moet ry om by hul bestemming te kom. Die gevolg is groot skade — die toegeld moes taamlik drasties styg om vervoerkostes te dek. Dit sal darem baie slegter moet gaan voor hierdie klomp Pukke se geesdrif en liefde vir die berge gedemp word.

Voornemende klimmers kan maar net die kennisgewingbord vir inligting dophou.

★ Vervolg van bladsy 1

Piet Strydom daarenteen het gesukkel en het nooit na 'n provinsiale heelagter gelyk nie.

Choppie Taylor wat vir die C-proefspan uitgedraf het, was 'n eenoog-koning onder die blindes. Terwyl Schalk van der Merwe met bitter swak ouens soos Jaguar de Jager tevrede moes wees, en as gevolg daarvan sy plek moes afstaan aan Taylor.

Florna na Natal se berge

VANJAAR onderneem Florna weer 'n toer na die Drakensberge. Die toer sal duur vanaf 3 April tot 10 April vir 11 April. Vervoer bestaan uit 'n groot Leyland-bus en die koste is 'n baie billike R18.

Daar is reeds twintig dames wat saamgaan, maar slegs 17 mans. Daar is plek vir twintig. Persone wat belang stel kan skakel met Phillie Hattingh by Skuur, Gang nege (K 197). Dames kan skakel met Hettie Hattingh in Oosterhof. Mans kan ook in verbinding tree met Theuns Eloff of Andrew Deacon. sence makes the heart grow fonder” maar so af en toe stap sy skelm langs 'n donkerkop ou — pasop!

U het volop keuse in ons groot verskeidenheid

- HANDBOEKE
- SKRYFBEHOEFTE
- EN WAT U OOK AL VAN 'N BOEKHANDELAAR VERLANG

PRO REGE-PERS BEPERK

„Die Potchefstroomse Boekhandel”

TOMSTRAAT 86 — POTCHEFSTROOM

TEL. 5236

—ST

Sêr-kompetisie

VAN 19 tot 21 Maart het daar weer eens skril, lae, hoë en melodiese klanke uit die Totiussaai opgeklink — die jaarlikse sêrkompetisie was in hoë versnelling.

Vir drie weke is daar klip-hard geoëfen. Vriende is gemaak met die teenoorgestelde geslag met die hulp van kofiebekers, want elke koshuis het 'n sersleep gekry. So het Over-de-Voor oor die spoor gaan kuier en met Klawerhof aan die hand die eerste prys met die gemengde sêr losgeslaan. Liberalia en Oosterhof was tweede met Uitspan en Vergeet-my-nie kort op hulle hakke.

Met die manskompetisie Woensdagaand vat Klooster se Pikkewyne toe losweg die eerste plek, en Uitspan se tradisionele klank besorg hulle die tweede plek, en Over-de-Voor kom derde. Makoulei se oorspronklikheid het gemaak dat hulle spesiale vermelding gekry het.

Die dames se standaard was uitstekend en die beoordelaars moes behoorlik kopkrap. Me-

nige Adam se hart moes noodwendig vinniger klop, want Oosterhof, Klawerhof en Karlén (in wenvolgorde) was al drie puik, en die ander glad nie te versmaai nie!

As ons gekyk het na die opkoms van elke aand kan die A.B.K.K. verseker wees dat dit een van hul aksies is wat baie aftrek geniet.

Die Pukke is ook heel tevrede met die beoordelaars se uitslag. Ek dink ek praat namens my mede-studente en as ek sê, „Moenie dat die sêr hier doodloop nie“. Kom beoefen julle talente onder die naam — ek dink nie daar is nog iets wat so goed is vir 'n hartseer-hart, gelukkige-hart en vir 'n swot-hart nie. En dan vra ek — erken die skoonheid al is dit net deur julle liggies te laat flikker.

Anne du Plessis.

KLOOSTER

JA, en toe vind Soekor uiteindelik onuitputlike oliebronne. En dit nogal in Potchefstroom. En dit nogal reg onder Piet van Niekerk se Volks-wagen. Ons het almal gewet Piet is bestem vir groot dinge.

Moenie vergeet van Klooster se openbare veiling van radio's, bandmasjiene en platespelers môre nie. Met al die soete sêr in ons tuine het sulke dinge oorbodig geword. So van sêr gepraat — Aan al die Pukkewyfs: julle finale sêr-repetisie in die Totiussaai was mooi, maar nie so mooi as die uiteindelijke kompetisie hier by Klooster nie. Ons is 'n waarderende gehoor.

Aan Wag'n-Bietjie — ons kan nie meer wag vir die volgende aksie nie. Dis nou in die lig van die vorige.

En in verband met die manne se sêr-kompetisie. Het die Pukkewyne nie nou bewys wat hulle met al die wind wat hulle toegedig word doen nie? Beslis nie trompetter nie.

Ook die gehalte van ons rugby is rede tot trots. Met ons eerstespan wat vir Wes-Transvaal uitdraf en tweedes vir PUK het ons derdespan darem

Aan almal van Klawerhof en Over-de-Voor wat gesêr het: hou die tradisie — beide koshuise het plekke in die individuele sang behaal en gesamentlik eerste gekom — volgende jaar doen ons dit weer!

Herman Smuts.

LIBERALIA

HAAI, dis lekker om 'n teenybopper te wees! (Vir die wat nou nog nie weet nie, ons het 11 Maart tien jaar oud geword). Baie dankie vir al die felisitasies; ons blom oor al die mooi gedagtes. Dankie aan al die dames wat saam met ons by Boskop die verjaardag sy hoogtepunt laat bereik het. O ja, baie dankie aan Pa Prel vir sy feesrede. So van Pa gepraat, hy loop deesdae ook weer kaal deur die Sentrale Eetsaal en op die kampus rond; kaalkop bedoel ek, tot verskrikking vir dié met langerige hare.

Dames, weet julle... Nee, wag eers 'n bietjie, dis gans te belangrik.

Nou die sêr: Met die mans-sêr het ons te veel gebrom. Daar was te veel eerstejaars in die groep. Attie, dankie vir jou moeite met die afgrigting.

KASKENADES

PUKKE, die OOG hou julle dop!

- 1) Die dames wie saans so kos uitdra, het julle geweet dat Archimedes se derde wet sê: Eet het 'n bese kringloop... Hoe meer kos jy uit die eetsaal uitdra, hoe meer krag het jy nodig; hoe meer kos jy nodig het, hoe meer dra jy uit die eetsaal...
- 2) Die OOG (en al die seniors) wonder wat van al die eerstejaars geword het, by die rugby, bv., of by die Eerstejaarsdebat...?
- 3) Manne, daar is net een manier om 'n vrou te beveg. Dit is met jou hoed... vat hom en loop!

despan van Skuur verloor 31—0 teen PGD 2, en die derdespan Over de Voor se derde span 17—8.

'n Dringende versoek word aan al die Dorpstudente gerig, die wat nie rugby speel nie, asook die dames van Wanda en alle ander belangstellendes om Saterdag saam met jul spanne te kom swoeg en sweet; onthou: die toeskouers is net so belangrik, indien nie belangriker as die skeidsregter nie, in die geval van koshuisrugby.

Terwyl ons so praat van sweet, ons ouens oefen al lekker landloop; ons kom elke middag om 4.30 nm. by Cachet woonstelle bymekaar vir oef-

punt. — En hier keer ek vir jou die hele sak patats uit.

Die fondament wat nou so breed en stewig is, is die saamstaan van die eerstelingen. Goed geteeld, die klompie. Trap maar in hier, en sy staan op as jy inkom (watter manne doen dit nog, terloops).

Loop verby haar op die kampus — sy sal jou roep as jy nie groot nie. Sy word verplig om hier en daar 'n vergadering by te bring en as systout is word sy gehê, — haar aksie? Sy sal uit haar eie die vierkant se grasante sny, sommer vanself jou skinkbord vat, of jou emmer wasgoed.

Moeite is ons plesier — jy wat altyd hier kom sêr sal weet van die koffie, en jy wat hier gepos is... jy sal weet van die entoesiasme. Soms bak ons dalk op 'n Saterdagmôre sesuur vir „besoekers“ skons. Ander kere klop ons saam teen twaalfuur se kant aan jou voordeur en jy vat die koffiekant sitkamer toe. Uit die beboender kom eet julle dan al ons toebrödjies, en waak goedgunstiglik oor ons op pad terug.

SKUUR

DAT die Olifant dié jaar op die oorlogspad is, is nou maar waar. Geluk aan ons Rooitruie wat aan die verwagtings voldoen het deur die Pukkewyne te vou. Net om te wys dat dit nie geluk was nie, het ons vierdespan as toegif ook Klooster se derdespan met die kop onder die vlerkvere huis toe gestuur. Aan al ons manne in die Puk-spanne veels geluk.

Dat die Skuur van binne woe, is seker. Kom kyk maar hoe ons vooraansig by die dag in aantreklikheid toeneem. Onthou net om jul kameras te bring (Fotoregte is in Kamer 87 te kry). Dat mens met beperkte middele 'n kasteel kan inrig, het Voëlvele (gang agt) se manne bewys. Die eerstejaars dra hul gelukwensing oor aan die seniors ná lg. se reuse-oorwinning in die krieket.

Aan seniorkant was die Beer baie knap, terwyl Hannes en Haakon vir die Hande die woorde die drif probeer sleep het.

★ Vervolg van bladsy 3

Weg met...

As hierdie sierlike egoïsme nie uitgeroei word nie bly daar vir ons weinig hoop. Karnaval moet 'n tyd wees van saamwerk, saamontspan, saamge-niet.

Laat ons dit vanjaar ernstig maak om Karnaval aan sy doel te laat beantwoord. Om van kan dit alleen doen deur se trokke te wees en elkeen se bydrae te lewer.

Moenie net wil teer op die inisiatief van die karnavalkomitee nie, gebruik ook jou eie KARNIVAL MOET GEHOUD WORD EN NIE AANGEBIED WORD NIE.

OOSTERHOF

„SAL al die dames wat aan die sêr-kompetisie deelneem asseblief afkom sitkamer toe?“ Ja, dit is geluide wat knaend en aanhoudend deur die gange weergalm het. Baie maal is gesug, gekreun maar almal het skouer aan die wiel gesit en spoedig is tussen die aanhoudende gesing en „gesang“ tog gelag en grappies gemaak, sodat dit vir 'n ieder Oosternooi 'n plesier was om vroeg en laat in die oggend die „kore“ aan te hoor.

Alles was natuurlik die moeite werd, want het ons nie bewys dat OOSTERHOF steeds die singende koshuis op die PUK is nie? Natuurlik het ons die tradisie volgehou en wen ons die Dames-sêr sowel as die gemengde-sêr saam met Liberalia. Geluk aan die twee groepe, julle het weer gewys waartoe ons in staat is, die bakste koshuis op die plaas?

Maar, dis nie al nie, OOSTERHOF het begin met hul eie OOSTERVARIA! Ja, soos gewoonlik gee ons weer die toon aan. Alle Oosternooiens, en ook julle Pukke, is welkom om Maandae-aande in te skakel op die interkom-stelsel van OOSTERVARIA, en oondvars-skinderneus en koshuisneus te ontvang. BY dit alles

musiek uit die boonste rakke, danksy die tegniese versorging van ons eie OOSTERNOOIENS.

'n Gemmerbier en brood was die ou dames se voorland, en glo my, het ons gesmul in die laat nagtelike ure, ... eerstejaars julle maak punte, maar ons bly darem in so 'n oulike koshuis.

Liberalia is die koshuis wat die jaar OOSTERHOF se Karnaval-metgesel is, en na ons fees, bou ons alweer die wenvlot, of wat sê julle manne...

Sprokiesland word 'n eetsaal waar Oosterhof se dames en Skuur se manne saam 'n inter-masker hou. Dit is die toneel wat hom Maandagaand in Oosterhof afgespeel het.

Met dié anderse soort interte is nie net kleur aan die gewone, soms afgesaagde onderwerp verleen nie, maar is ook 'n aangename, ontspanne atmosfeer geskep waarin die manne en asters sonder terughoudendheid gemeng het.

KOSHUISKOS

ten minste goed genoeg teen Skuur se eerste vyftien gevaar om die skare mal te maak. Piet Möller sê stapelmal.

Vir ons slotversie 'n aanhaling uit die nalatenskap van die gevierde Britse wysgeer, Andy Capp — „If yer can't keep the bright side up, then keep the upside bright“.

OVERHOF

Om te sing en te lag...
Om te sing en mens te wees...

DIT is studentwees.

Met die sêrkompetisie voor die deur het Over de Voor en Klawerhof besluit om hierdie jaar iets groots daarvan te maak, want word daar dan nie iets groots van twee sulke koshuise verwag nie?

Hoe kan 'n mens vir iemand vertel van die laatnag saamsing totdat die stemme en die oë nie meer wou nie? Willemien wat soms erg moedeloos kon lyk; Bea wat gehelp het met die vals note; Marlize wat moes regkom met die „off-beats“ — elkeen het sy deel gedoen en nog 'n bietjie meer, want dit was nie soseer vir 'n eerste of tweede plek nie, maar vir die Twee Koshuise, hulle naam, hulle inwoners.

Woensdagnag was die aand van minslaap in baiesing, eers by die Voor, later in die saal, in nog later in die hoofgebou. Die maagsenuwees was al op 'n knop, maar ons het geweet...

Donderdagaand was dié aand. Met harte wat in ons kele sit het die gordyne oopgegaan... en ons het gesing. Nie vir 'n gehoor nie, nie vir die saal nie, maar ons het gesê, vir Twee Koshuise.

Hoe goed, goed voel 'n mens nie as jou moeite beloon word en as daar afgekondig word dat jy 'n eerste plek behaal het nie! Nie soseer om die eerste plek nie, maar om jou Koshuis.

Die gemengde sêr met Oosterhof — hier het dieselfde engelse voortgekras. Wat die evasgeslag nie met so 'n brommerige stem kan doen nie. En natuurlik het Christa al die pad ook baie daartoe bygedra. Dankie, Christa, al die pad gaan ons vanjaar nog baie feeste hê.

Feeste? Wanneer gaan die haan met die buffel afhaak? Vanaand by die interdam? Wonder net wat die naam gaan wees, Oosteralia of Liberaliahof? (Hang af wie die baas in die huis gaan wees of wie vir wie die hof gaan maak.)

Geluk aan Kompleks se eerste rugbyspan met hulle oorwinning! Wag tot die buffel wakker word en regtig begin snork!

Aan ons hergeorganiseerde huiskomitee, sterkte met die arbeid! Jan het nou tot die verheve posisie van primarius geklim en Frederick is die nuwe hand (of sal ek nou sê lyf) in die spannetjie. Eerstejaars, hoe voel julle oor die keuse? Lekker, né?

Dames mag ek nou... Nee, wag nog so 'n bietjie.

Verdere hoogtepunte in ons eentonige studentelewe was 'n interkaas en -wyn met Kasteel-Suid en 'n interflik per baiesukkel met Kasteel A. Dankie aan julle en besonders ook aan Linda, Barbara en Patrus — die ontspanningsreëlaars.

Dames, ek dink die tyd is nou ryp, nou die groot nuus: Ons het 'n nuwe telefoon wat werk! (Net jammer die ding vreet so baie vyfsente.)

DORP

DIE feit dat Dorp in die afge-lope twee Wapaaie afwesig was, beteken nie dat Dorp ondertussen stilgestaan het nie. Met die eerste ligawedstryd teken PGDJ 26 punte aan teenoor Over de Voor se 18; die twee-

ning. Hierdie jaar is die Landloopklub se voorsitter 'n Dorpstudent, wat dit vir elke Dorpe-naar wat in Landloop belangstempel amper 'n moet maak om saam te kom draf. Kom draf saam!

MAKOUVLEI

HIER in Makoulei is sake weer in volle swang. Die klem val nog steeds op die regte aksies soos intertees, sêr, sport en allerhande feeste, en minderbelangrike dinge soos akademiese word op die agtergrond gehou. 'n Groot bron van vermaak is deesdae en „deesnagte“ die vingersnoekerbord. Ek wonder wie nou eintlik die koshuiskampioene is? Hulle moet gerus vir Paul en Christie daag.

Met die sport gaan dit voor die wind. Geluk aan Hugo Lindeberg en Attie Evans, onderskeidelik Puk se nommer een en twee pluimbalspelers. Ook die twee eerstejaars, Gert Dorward en Johan Marais, het besonder lang ams, en 'n spesiale pluimpie aan Gert met sy puik rekords.

Met die sleepaksies gaan dit ook nog voor die wind. Die koshuis is saans sleeptyd so stil soos 'n I.W. klas op 'n Saterdagmiddag. Dit lyk ook darem of die snoepie 'n hoër winsyfer gaan toon vanjaar.

Baie geluk aan al die manne wat verjaar het, en ook aan Johan Muller met sy wit das wat hy nou Sondae in die diakenbank tentoonstel. As hy so aangaan is hy binne ses jaar 'n predikant.

Die eerstejaars wens die seniors 'n aangename vakansie toe en laasgenoemdes verseker die adders dat hulle nie sal vergeet nie.

KULU

DIE dinge hier werk nes 'n groot gees onlangs gesê het: 'n Piramide: Hoe breër die fondament, hoe hoër die hoogte-

han Malan (Edms.) Bpk.

VUURMAAKHOUT

OWENLAAN 2

en

GOEDERE ERF,

Potchefstroom Stasie.

TELEFOON 5371.

—:—:—:—:—:—:—

ONS LEWER AF

—:—:—:—:—:—:—

Posbus 69,

POTCHEFSTROOM.

—ST



REGS: Die Pukke en Wes-Transvalers spook hard vir die wit balletjie.

ONDER: Die dames is net so gevaarlik met 'n hokkiestok.

LINKS: Die skare verkyk hulle aan die korfbaldames.

ONDER REGS: Die Puk en Wes-Transvaaldames speel „touch-rugby“ op 'n netbalbaan.



FEESSPORT



REGS EN ONDER: Die toeskouers kyk deur 'n bril, donker glase of sonder 'n bril.



P.G.D. TEM LEEU

MET slegs 14 man en sonder 'n kaptein het die span van P.G.D. hul eerste ligawedstryd teen Over de Voor met 26—18 gewen. Binne die eerste vyf minute van die wedstryd het P.G.D. se kaptein, Willem van Zyl 'n handbesering opgedoen en moes hy die veld verlaat. Met een van die voorspelers weg moes die drie losvoorspelers vaster speel.

Dit was 'n harde en skoon wedstryd, waar dit gewoonlik gekenmerk word vir sy vuil spel. Albei spanne verdien hier die lof vir hulle spel.

Die manne van P.G.D. het deurgaans as 'n span gespeel en die oorwinning is dan ook te danke aan die spanpoging. Dit was veral by die losballe waar die span van P.G.D. eerste was, asook die doelgerigte skoppe van die skakels. Om van die spelers uit te sonder sou moeilik wees aangesien die hele span goeie en harde spel gelewer het. Een van die vele mooi bewegings van die wedstryd was toe P.G.D. se linkervleuel Hennie Saayman die bal binne sy eie kwartgebied gekry het en 'n drie agter de Voor se pale gedruk

het.

Die wedstryd het baie belangstelling uitgelok en was goed ondersteun. Die opponerende kantlyne het soms met pittige sêgoed vorendag gekom. Die wedstryd het onder 'n baie goeie gees plaasgevind, veral aangesien die gebrul veroorsaak het dat die stemme naderhand moes sagter word. Dit werk glo in op die stembande.

Een van Over de Voor se voorrymanne, Karel Verwey, moes die veld vyf minute voor die einde van die wedstryd met 'n kopbesering verlaat.

P.G.D. se eerstes het soos wafferse leutemmers die leeu getem. Saterdag se 26—18 het dit bewys.

KAMPIOENMAKERS

Hengelgerei

JAG



Safari
SPORT
EDMS. BPK

**SANTAM - ARKADE
KERKSTRAAT
TEL. 7673
POTCHEFSTROOM**

sport

'N DROOM het Saterdag werklikheid geword. Die ingebruikneming van 'n kompleks soos die Fanie du Toit-sportterrein is 'n gebeurtenis wat net een maal in 'n universiteit se leeftyd geskied.

Die organiseerders het gesorg dat dit 'n feestelike geleentheid is. 'n Duisend deelnemers het kom meeding in

rugby, krieket, hokkie, netbal, korfbal, tennis, atletiek en rolbal. Daar was ook nie minder nie as sesduisend toeskouers wat hulle verlustig het aan die groot sportdis.

As 'n mens dink aan die twee, drie lappies gras waarop al die rugbywedstryde ge-

speel is, aan die hardgerolde brakkoi wat as hokkieveld gedien het, kom 'n mens agter hoe 'n brandende begeerte 'n nuwe sportterrein 'n paar jaar gelede moes wees.

Vir mnr. Piet Malan en al sy makkers wat elke tree saam met hom gestry het vir die daarstelling van hierdie pragkompleks, was Saterdag

seker een van die grootste dae in hul lewens toe hulle gesien het hoe 'n droom werklikheid word.

Sam Basch en Attie Gerber was Saterdag op die toneel om die belangrikste gebeurtenis op film vas te lê. Op hierdie bladsy kry u 'n beeld van die dag se hoogtepunte.

'N DROOM WORD WERKLIKHEID



REGS BO: Dries Coetzer beurt oor die doellyn met 'n pak opponente op sy rug.

MIDDEL REGS: Oud-Springbokkriekkaptein Trevor Goddard stuur 'n bal met sy hotklou af.



MIDDEL HEEL REGS: Kobus Louw, vleuel van die Uitnodigingspan, druk een van sy twee pragdieë.

ONDER LINKS: Elmo Ferreira, die Puk se enkelspelkampioen, slaan af.

ONDER-REGS: Dawie Snyman, Springbok-losskakel wat vir die Uitnodigingspan gespeel het.

LINKS BO: Oud-Puk Fanie van Zijl breek die lint ná 'n opwindende 800 meter.

LINKS ONDER: Rolbal en albasters, alles was daar op Fanie du Toit.



MOTOLEK

Hierdie onderdele is
by u plaaslike

MOTOLEK

verspreider
verkrygbaar...

POTCH SPARES

Lombardstraat 39, Tel. 6077, 4595,
POTCHEFSTROOM.

ELECTRICAL PARTS FOR JAPANESE CARS &
TRUCKS.

 **motolek**

—ST